



SIUMUT INATSISARTUNI ILAASORTAATITAT / LANDSTINGSGRUPPEN

17. december 09

Inatsisartut suleriaasianni § 36 imm. 1 naapertorlugu Naalakkersuisunut apeqqut imaattoq matumuuna saqqummiuppara:

- 1) **Ukiortaamiit højskolerniarlutik aallartinngitsoortussat 400-it missaaniittut suffissaaleqinissaat pinngitsoortinniarlugu Naalakkersuisuniit qanoq iliuseqarfigineqarnissaannik eqqarsaatersortoqarnerluni?**
 - a) **Iliuseqartoqarnissaannik pilersaaruteqartoqarsimappat, suut suliniutissatut eqqarsaataappat?**
 - b) **Iliuseqartoqarnissaannik pilersaartoqanngippat sooq taamaaliortoqanngila?, taamannammi inissittoqarnera nutaarsiassaangilaq tassanngaannaq takkuttoq.**
- 2) **Højskolet qanoq iliornikkut ilinniartussaminnik amerlanerusunik tiguisinnaanngortinneqarsinnaappat?**

Tungavilersuutit:

Januar 2010-miit inuusuttut 400-it missaaniittut højskolerniaraluarlutik inissaqartinneqaratik aningaasassaqartinneqaratillu aallartinngitsoortussanngornerisa kingunerisaanik sulerissanersut sulerisinneqassanersulluunniit ilisimaneqarnerluni kiisalu pisortat tungaanniit arlaatigut iliuseqarfigineqalersaarnerlutik?

Ilinniartitaanermummi Naalakkersuisup Tusagassiuutinut oqaatigiinnartarpaa Højskolit nammineerlutik ingerlasuugamik aningaasaqarnertik nammineerlutik aqqittariaqaraat, naak Naalakkersuisup oqaatiginiartaraluaraa nammineq Naalakkersuisutut pingaartinnerpaasami højskolit ilagigaluaraa. Ilanngullugu inuusuttut 400-it missaaniittut aallartinngitsoortussat pillugit oqaatigiinnarpaa, "*soorunami neriutiginngeqaara inuusuttut unittuussanngitsut [...]".* Taamatut oqaannartoqarnera naammaginngilaq nalunagu Nuup avataani ukiuunerani suliffissat qanoq ajornartigisut, nalunngereerlutigulu 2010-mut Aningaasanut Inatsisissaq pissutigalugu Nuup avataani suliffissat ajornarnerulertussaasut.

Naalakkersuisumut apeqqutigerusupparattaaq Højskolet qanoq isillutik ullumikkumiit amerlanerusunik ilinniartoqalersinnaanersut aningaasaliissutit taamatut isikkoqartillugit?



SIUMUT INATSISARTUNI ILAASORTAATITAT / LANDSTINGSGRUPPEN

Højskolimmi pisortaasa siulersuisuisalu arlaleriarlutik oqaatigisarpaat ullumikkutut aningaasaliissutit isikkoqartillugit ingamillu 2011-miit taamak annertutigisumik sipaarniarfigineqartussanngorlutik amerlanerusunik iliniartoqalernissaminnut akissaqanngilluinnarlutik.

Taamaattumik paaserusunnarpoq ilinniartut amerlanerusut aallartitalernissaannut Naalakkersuisoq pivusorsiortunik qanoq ittunik siunnersuuteqarsinnaanersoq, pilersaaruteqarnersorluunniit!?